

5
18

北行日譜全

明朱祖文著

進步書局校印



北行日譜序

自古忠臣義士烈烈而死令人追攀千百世之下欲彷彿其咳唾涯略而不得則有意為摹而響為附者所傳聞異詞所徵述異狀而疑信參焉於是門弟子及私淑之徒有年譜之作間繫以月以日而考信者始有所憑而不眩若夫天地晦冥狂飈駭電瞬息百態年月有所不及詳而身其事者按日而譜之則若北行日譜是已日譜者何完天朱先生之書也日譜而繫之北行者何因周吏部行也吏部為天啟名臣第一人凡緣吏部受險艱者例得大書特書不一書相率牽連以書而况身其事者之自為書乎余三復而悲之書之而與吏部往復者十三與吏部往復於寸楮九帛飛出棘端狂吻之際者十二去來畿輔間與吏部心知默為拮据相往還者十之五大抵與吏部語皆蕭疎慷慨如在鼎鑊百沸中而條然噓之以清風者也與吏部諸相知語沈冥慘淡如數通匪亡曲為求全之路不敢大聲疾呼為德而類之耳鳴者也至於寸楮九帛之傳在吏部則為狄公去絮之衣在家人則為蘇公誤進之炙如新鬼薦羹巫史紛若幾幾於肝蟹之一線而或咻之或怵之者也嗟乎言至此而朱先生周旋之情事尚忍言哉宋文信公前後指南錄備述時日且各系之以詩我朝

楊忠愍公亦於獄中作年譜鬚眉俛仰至今炳烺如見然主方虛相位以待而嘉靖中葉柄臣祗偷於驪龍之睡以弄其太阿兩公得閒而自為書也固宜迺逆聞熾燄時何如也以逆聞之熾燄猝發於天下第一人而開讀激變死傷狼藉其棄疾於吳人與詞吳人之周旋於吏部者將何所不至朱先生既身其事而又能於控倂中按時日而譜之使千百世之下不苦於親炙私淑之無人及他傳聞異詞徵信異狀者猶得有所折衷焉朱先生之為吏部可稱死交矣先生之死蓋得於憂與勞幸獲首丘而終牖下然及離照之升而不及震威之震先生實齋恨以死也身為世哲又為名諸生而家故酷貧沒而棺斂舖糜皆藉同人取給即是刻亦余輩醜金為之生平多熾行不書書其為吏部者崇禎己巳秋沁園人張世偉頓首撰 邵彌書於津逮

軒

北行日譜序

北行日譜朱完天先生為周吏部北行時譜也余讀而感愴惘乎其有餘悲焉曰嗟乎禍患之際豈不難言之哉方是時賊璫鼓實張甚所以密布耳目而詢人動息者前後數百輩而未已也於是諸凡與吏部周旋者咸或避匿弗敢以名跡見矣羣情洶洶疑日甚吏部旦莫且北而欲為捍牧圉職橐體者環視而或難其人也一二同人輩樂為吏部死非不人百其身顧其勢又各有所牽阻獨先生一人能脫然奮身負羈絏以相從於孤危迫阨之中而無所難焉斯其事即於吏部非有分毫關損益而吾黨友朋之誼不深嘉賴之哉且先生與吏部初亦非深相識獨以母夫人旌節一事感吏部之相成故遂委心許以驅馳夫世人修小意氣搶攘感慨之中輒相然信以死問亦有之而要其所為結心矢報大都不出聲名利祿相煦相沫之間耳而先生之所為致感於吏部而幾幾乎必欲得一當者顧獨在此此又何也先生始北歸為我道吏部死事而獨搯扼於不獲含歛以為深憾嗟乎此於先生奚憾也先生是時方有吳橋之役安能復與其後事相及哉且先生固早知吏部不免然亦庸詎知其倉卒至此不復少須臾也此於先生奚憾也先生歸未幾而以先時在道勞

痺疾遂不起先生真以死報吏部矣此於先生亦奚憾焉余猶記吏部別去時余復寄聲謂恨不能斃鉗從行使田叔孟舒輩獨有千古以為心中一大欠事嗟乎若先生者其高誼豈復出田叔孟舒諸人下哉而余心中欠事亦若藉以少補萬分一此余所以讀譜而重有感也而因為之論著若此至於譜之所以作與譜之不可不作先生自有序嗣長公有序吾友異度有序序詳矣余不復及云時崇禎己巳秋日未

陞宣稽首撰

薛吉書

小引

日譜者何譜北行也北行奚為而譜蓋斯行也實為蓼洲先生先生被逮從容慷慨之氣象宜譜不意細民無知以哀控而至憤激其間斟酌之不為自裁而為赴闕甘心鼎鑊之氣節宜譜吾蘇諸君子之遊於京者爭為先生効一臂一種之肝膽宜譜北方諸君子急先生之難慮無不殫之力千秋之意氣宜譜未也與先生未識一面者靡勝兼美之好或為竭蹶贖金或為捐軀趨事以庶幾先生之一生不宜譜乎與先生為金石交者既為妄覲其生復為深痛其死思為先生孤寡永遠計不宜譜乎未也先生之僕匍匐赤日往來如織更有隻身孤旅拮据舍殮以結先生此身之局者自有斯譜而其心不泯即諸君子之僕僕憔悴征途至有緣是骨立者自有是譜而其勞不泯不寧惟是譜及彼地之芳蹤而名公之家範宛然足為吾黨取法也譜及彼時之觀記而當年之人事裨然足為後人考鏡也異日者公論既定太史氏秉如椽之筆為先生不朽先生之品昭於日星濱行一段光景諸君子惟有能言之者初不以斯譜為有無然凡諸為先生殫厥心力者必且旁及此則文實與聞諸君子未必知也則斯日譜亦採擇之所必也其可少乎獨是文實拜先生明賜竟於舍殮

不及躬親北行之意謂何何以謝先生於地下則斯譜也初無解於文之懸負也第
先生者時局之所深忌其為先生者時局之所深求所宜深藏勿露留為日後張本
可耳慎之哉慎之哉丙寅一陽月三復居士朱祖文識

任俠傳

朱文學

吳門布衣金日升纂述

文學諱祖文。字叔經。完天。其別號也。世為樵李人。祖先應募禦倭。功最。累陞都督大將軍。世襲蘇州衛指揮。以廉勇聞。文學幼孤。母劉。勵節撫之。備集荼苦。文學長而端方穎異。雅不好武。被服躬行。有古人之風。弱冠補博士弟子。痛母志節未揚。不遑寢食。吏部周公順昌。初未識文學。會文太史諱震孟字文起為孝廉時。與文學習談。其母自操

特詳。吏部聞而憐之。慨然為白當道。得類題取旨。部牒下郡。而文學始知。乃為之風

泣搏頰。願為公死。無何。吏部忤瑞。被逮。變起倉卒。都人士惶懼不知所為。文學念此

行必無全理。願相隨。視其後事。以圖報慮。家人或相勸阻。遂不復歸。與吏部同宿公

所。中夜從容謂吏部曰。公灑然就道。良善。然事未可知。脫有緩急。誰可告者。吾當先

往為地。吏部首肯。良久曰。徐銀臺諱如珂字念陽肝腸如雪。必能相濟。願侍御諱宗孟字虞叟新入

臺中。意氣不薄。可與計事。此外則定興之鹿諱善繼字乾岳。吳橋之范諱景文字質公。熱腸急難。一

言相諾。生死不渝。皆可告者。文學遂別去。先走都下。比吏部未至。有以滅門事中。吏

部者。得銀臺力辯而解。至橐饘薄煇之事。侍御已先為之所矣。已而懸貲數千。文學

私幸旦夕告完。或得議獄。緩死百計。旬貨都門不足。則走定興。定興不足。則走吳橋。冒暑單騎。問關千餘里。逗留數十日。拮据稍就。而吏部已斃獄矣。吏部畢命之日。文學夜宿野店。有聲魂然。精誠相感。豈其誣耶。文學微服僻處。偵察動靜。每一感動。聞者悽惻。凡往來津渡。出入禁門。時遭邏卒。微幸獲免。亦危矣。然以身滯長途。弗復視。殮有違初心。遂至鬱以死。彌留之際。猶以吏部後人為念。嗟乎。文學之所以報吏部者。不已至乎。而總為一念孝思所激。夫以文學之至性篤行。固足不朽。矧其附青雲之士哉。

北行日語者何。完天先生譜先忠介被逮始末也。載其行事。日月具悉。歲久原板殘缺。將不能垂後。令子叔高廣搜鐫補。其孝思足尚焉。先生懿行。頌天臚筆傳中。略見一班。宜列篇首。俾閱是譜者。知先生楷模士林。不獨信友一事而已。先忠介被逮在天啟之丙寅。距今四十餘年。其間滄桑陵谷。真如夢幻。追思昔年情實。非所謂抗節死王事者耶。讀之不勝泫然流涕也。時康熙丙午中秋前。

周茂蘭謹識。

北行日譜

明 朱祖文著

文之獲交蓼洲周公也。則自先慈旌節事始也。先慈苦節四十有六年。緬維免喪之日。為庚申歲。同庠欲以苦節狀聞之當事。文私以商之。今太史湛持文先生。時先生猶孝廉也。先生曰。此事非財力兩足之家不可。今子家徒四壁。一青衿其何能辦。雖曩者吾甥姚現聞曾於孝廉時獲旌其母。吾蘇顧巖叟亦曾於諸生時獲旌其母。亦皆有大力為之援。今子無可傍借。將若何。文曰。母節艱辛。為人子者不能一為表揚。何以為子。文志決矣。成不成。人為政請不請。我為政先生亦甚壯之。夫以先生為名教宗主。而先父誌又出先生筆。凡諸艱辛之狀無不具悉其詳。且為文慎重若此。則事之不易可知。乃蓼洲公文初未一面。第感動先慈之節於殷汝劫名獻之一言。而徵信先慈之節於文先生之一誌。咨嗟歎息惻然垂憫。遂力言於當事。自郡邑大夫以至憲司直指。不遺餘力。且曰。此事非公祖父母力為主持。而待胥吏循行故事。則此節斷無蒙旌之日矣。迨旌表之旨奉已半載。禮部劄至。文始獲知。其為德何如。而不鏤心銘骨也。嗣是文中心藏之。第以公名位懸隔。雖蒙折節下交。然引分自安。非

歲時不敢輕謁。比公奉削奪之命。乃始時時過從。察公神情。亦若以文非趨炎附熱。不虛疇昔之知者。此文與公締交之案也。今歲三月之十有六日。天方晴。忽聞公被逮。大駭出門。彼時便已心念公此行。誰與偕往。意者其文乎。第長子館於浙。次于病於牀。季子身為督課。不能脫然。比至通衢。遇公西席鄒君虛玉。銘涕泗沾襟。欲偕北往。文令鄒體弱不堪。力為之阻。而遂身任之。公聞亦喜動顏色。因目吳君公如曰。子其為我一行。公如唯唯。乃議文與公如偕公之子子佩行。已有成說。是日諸君子便欲文與緹騎議所需。文曰。既文北行。不當使緹騎識面。以便彼中趨事。遂以斯事他屬。十七日。文念十八開議。公身一屬緹騎。便難披瀝。復遣公所冀得詢所欲言。而諸君子無論識不識。或揮淚。或懷金。或欲一望清輝而至者。踵接肩摩。聲如蚊聚。形如蟻擁。無須臾之暇。維時有貧士某。乃公素所恤者。不勝痛向公而泣。公笑曰。我一去。不復返。誰卹爾者。我應哭爾。爾反哭我哉。會有蔣兄名鉞者。語及傳神一事。文躍然曰。是烏可已。即托蔣促丹青君。丹青至。文為道意於側。公斷斷不可。再四揖丹青君出。若將免者。噫。公視此身為何物。曾有幾微兒女子態耶。午餘諸議者至。云與緹騎講許八百金。苦不能就。必欲文一行。文知諸君非為舌戰不敵。特以文為公所信。其

勢不能無增。姑借作一證據耳。不得已乃行。然既以登場。不能不認真一講。乃以公之冰菓告。而諸旂亦盛稱公之冰菓。且云倘公而不冰菓其操也。必且列卿寺。擁節鉞矣。自苦乃爾。何與人事。吾儕奉命而來。祇論官局索金。不問其貧不貧也。文曰。然則金從何來。諸旂曰。獨不有鄉紳在乎。文曰。否。法網嚴密。覘伺者多。為一捐助。懼有起而議其後者。疇敢以身試哉。諸旂又曰。然則獨無親友乎。彼其至親安在。文曰。言至此。則爾所謂自詒伊戚。予亦不能不為三歎息也。親莫親於子女之好。遂公且為貧交是求。即如長子之配。於時鉅富兼閱者多。願與公聯好。而公謝客曰。乃公如欲富。則厯官二政。儘足自潤。何必借潤他人。而令富女入貧家。其與我均茹荼乎。抑與我齋荼分茹乎。且使我父子姑媳有大不得其所者。幸勿復言。假使公當日肯為俯就。則今日之費。問之嫻家足矣。又何必煩吾輩之喋喋為諸旂不無心動。然似已誦諸好義之樂助者多。乃於八百之外。漸增數以千計矣。而堅執如故。遂各含淚而別。是日。文即宿公署。人散。一燈熒熒。文方欲叩公所欲言。公且出竹筵六七柄。從容揮毫。書至二柄。漏下已幾二十刻。文不能復待。力止公書。公乃略言數事。無宛轉叮呼也。文因笑語公曰。今夕光景。千古希覩。何幸躬逢其盛耶。十八日天將曙。諸議者

復走使從公所促文。文計不一二時且開議。事急矣。其敢有辭。乃復匍匐往。則諸君子。邇有魏某者。云是故錦衣書記之子。言當易投。遂與偕入魏。入。不措一辭。便慨然以一千三百金許之。先交四百。於是諸旂滿志。報命於公。時公伯子淚從心下。強顏相對。公仲子年方總丱。見公將出。署就。淚不自禁。公怡然曰。我天君方泰。反為若一哭所累。其速去。毋擾我。時已報午。諸司畢集。士民填委。而直指中丞且先後至。詎意忽有官旂之變。於時變出倉卒。赴義如狂。文以裹服。不使人晤。踣躅竟日。比暮。知公請因不得。乃歸公所。公所為兵憲行臺。防守甚密。文惟外望而已。十九日。文念公已無生理。而重以斯變。其謂之何。造憲署。苦不得入。至晚。當事者復移公入縣署。始得晤公。公是時了無怖懼。但多一番煩惱。曰。如無此變。則斯時我已從容就道。奈何有此紛紛。少選。公坐帷中。呼文耳語曰。誰為我語當事者。嚴兵衛我。間道夜半馳出城乎。而一時友生愛公特甚。哭聲震天。中有倡高景逸先生之說者。文謂公事與高先生微不同。高無民變。一自裁畢矣。公則多此一節事。須徐議。於時萬民擁塞。公赴闕之心如焚。文寬之曰。俟民心稍息。公始可定行期。此時一動。變更不測。公乃首肯。復事筆研。為一僧書扇。書齋額寄去。曰。事雖小。不可負諾也。門外洶洶。門內蕭蕭。被

逮之始。親朋雲集。自民變後。皆畏禍不前。時來詢問者。不過疇昔莫逆寥寥數人而已。是夕。文仍陪宿縣公署。二十日早。公乃笑向文曰。患難相依。我兩人真堪合傳。文曰。公當此際。而神情不動。乃堪不朽。若文之棲棲。特情不能已。何足道哉。自是日為行計。乃命同人佯播候旨之說。以息眾驚。而民亦稍稍解矣。是夕。文歸。密為束裝。彼時。說言孔將。諸親知方促。文趨避。何暇議及北往。內人一見。驚相謂曰。禍且旦夕。聞公椒蘭。咸栗栗懼。及而比鄰。已東奔西竄。巷為之空。汝速禍乃爾。如一家生命何。時文承爵之子壽康。新膺銜秩。伏枕傳語曰。祖勛不易。父此行或有他失。如祖勛何。文笑曰。事果株連。豈一避能免。奔竄特愚夫事。智者不為。乃若北行。業已心許。其忍相負。倘果緣是而及於難。亦命數使然。非予所得主也。其止勿復言。惟是內人喃喃謂公往必死。死必慘。奚不死於故鄉。而務往罹慘毒。則文中心不能不為動。就枕躊躇竟夕。詰朝二十一日。往闕廟。私以自裁之說卜之真君。籤若勸行。而自卜從行。則頗有危語。然念事勢至此。義無中止。復自奮曰。司馬公有云。天若祚宋。必無此事。今天若憫我。亦必無此禍。豈得以或然之禍。而奪必然之義。遂不復介胸中。則往。文太史支十金為行裝。往別本學吳師。名麟吳師曰。民變之疏十九已發。公即往。無與於旨。

之温不温。公身一往。萬一斃於嚴刑。已無足證。而金吾於公獄詞。以民變事。株連一
二緝紳。為彼黨所心恨者。則一網盡矣。何不從容旬日。處分後事。以一死了局。禍止
公身。以全諸紳為愈乎。文念株連之說。實彼黨所有。然在吾公。惟有赴闕為正。故前
說謂之忠於諸紳則可。其為吾公謀。猶似有未盡善也。然不敢以一己之見。傍撓其
間。遂唯唯。二十二早。公馳使相召。則已遠寓理刑公署。公署舊名金辦書院若為候旨者。然文
意公或為前說所動。至則促裝耳。於時馳一价以力阻公行者。言娓娓。公則計不反
顧。毅然以一身甘鼎。錢且曰。若輩為所欲為。苦無大人君子張膽明目教誨之耳。我
且甘身蓋粉。正言教誨若輩。是日文復馳歸。計彼時文雖足跡不至變所。然朝夕吾
公必已為覘伺者物色。其能免於吏議。倘此往或有起而議其後者。不能分身相應。
必且以逃匿相加。實其罪案。遂草一呈。直以同公子追隨吾公。明告本學。以為異日
張本。囑家中一俟發足。即投而文子專增。尚本冠。見此行不可止。遂力請從。曰。父老
矣。長途左右。其可無兒。文笑曰。兒念甚佳。然此苦趣。非兒所能嘗。萬萬不可。力止。乃
已。二十三日。為合餞明卿太史之日。文為倡於旬日前者。文念知己在難。何忍銜杯。
遂不赴。而即於是日赴公署。為長行計。公之長行。實惟二十五日子夜。文恐栖遲家。

中。即有剛腸。或為兒女子所撓。遂一出不復歸。壽增苦欲識公。遂與偕入。此兒因文在署。連造三日。爰公清輝。不可謂非幸也。又公見此兒持有竹筴。特為之題。手澤宛然。不尤幸乎。二十四日早。公呼長子拜文。文曰。若然。是以不肖待文矣。公乃止。而反躬為之叩。顧長公曰。從此以伯呼之。文遠遯不敢當。是日。聞申中丞元翁罷官歸。文與中丞為舊賓主。且為先大夫生平知己。太父身後。先年百戰勛。得微橫金世爵。實惟中丞力。義無不往候也者。復念此身一出公署。更復牽纏。公之今日。是何光景。文既戀戀於此。即不往。不為忽然。乃第以一函致意。是日。公語文曰。弟別無一事牽腸。獨先人未葬。此死不瞑目之事。蓋筮仕之日。既所不及。里居數年。營有馬鬣。一切地下之事。已為畢辦。第以年月未宜。故為稍待。今不幸值此。幹父之靈。有吾子在。兄其輔襄大事。無一語及妻孥。自被逮迄今。如一日也。文因謂公此行。存亡未卜。且與家人永訣矣。就道之日。尊夫人攜諸幼子登舟。可得一別。公搔首曰。徒亂人思。不可復詢公。以公今日有此奇禍。自反。愿官亦有一二冤獄。為公隱衷。所不自安者否。公隨聲應曰。此弟一生可自信者。今日之事。蓋往因中業。如不通釋典。幾不能自解矣。二十五日長行。館於浙之長子。因呼遲。約其歸囑家事。而尚未至。遂不復待。是日。文計

公此行。決無生理。文豈能別効一臂。惟有一抵長安。速治棺櫬以待。一有不幸。則躬為含殮。以効友朋之義。以慰孤寡之心。此出門作想也。是夜漏下二十餘刻。遂行。比及舟。彼時兵士戒嚴。胥江之許。幾無隙地。地既泥濘。人復蹂雜昏黑中。忽失長公所。在蓋使者唐元。恐為緹騎所物色。私與偕歸。公忽出意外。念甚。呼文覓之。乃與兒壽增。於昏黑中。自胥江至洞涇。匍匐將十里。抵公家。已漏下四十刻矣。知公子已歸。懸旌始定。二十六早。於公家發舟。是時公內弟公如吳。兄名爾以有太夫人在堂。恐遭母氏憂而止。乃獨與公長子子佩行。是時送文登舟者。則惟張氏孟舒名世異度名世。偉兩伯仲耳。二十八早。至雲陽。公已有成命。立趨子佩歸矣。逆料公心。民變日傷。其少年緹騎一人。未必不為報復。而又戒心於江浙相失之事。故深為之慮。子佩含淚向文曰。父決不欲我往。奈何。文曰。尊公自有深意。父命其敢有違。且斯何時也。母夫人柔腸欲斷。兄歸苦慰母夫人。孝自在耳。力勸之歸。已而四月初旬。奸人忽造偽旨。謂籍沒公家。家人一時星散。夫人幾欲自盡。微子佩力為寬解。夫人已歸泉壤矣。子佩此歸。不可謂非彼蒼默佑也。於時文亦私轉一念。公之子。公且堅不欲往。則事之危殆可知。然少生退怯。如一己之生平何。遂獨任不辭。偕公使唐元嚴秀二人。先公

而往擬從雲陽登陸。而唐元以驛貴。欲走瓜州。會此時。彼地諸旂羣集。恐為物色。遂從其說。至瓜州。則天雨泥濘。而又計從清江浦登途為便。乃遂往清江浦。二十九日。舟抵維揚候關。兩僕登岸。有長髯呼之曰。爾已來乎。不為應。則又曰。爾蘇人也。若素相識者。然回述於文。殊為之異。初二。從清江浦登陸。有差騎一人。馬已馳過。忽復馳回向文。亦曰。爾已來乎。不為應。則又亦曰。爾蘇人也。為之唯唯。始去。方宿逆旅。唐元私語文曰。頃之差騎寓。適相對。又復相問。而其語若知我等蹤跡。文疑此必織造之使。物色偕來者。此時有公致鹿職。方孫孝廉兩函。遂欲焚之以滅跡。而又念非此無以取信二公。方擾擾胸中。忽有羣捶逆旅之門者。其聲甚厲。則謂必差騎我擒無疑。靜聽。乃縣役呼里役也。抵扉。便夢先都督至。文急訴以北行之故。及商焚書之事。先都督熟視不言。比醒。私念不言者。似可付之無言也。乃不焚。而以書入唐元。卧具。蓋搜必先。文之行囊。彼所注意。元之卧具。彼之所忽。萬一可倖脫耳。初三日。始知此人昨偶乘差騎。早已僱驛而去。驚心始定。及之前途。乃舟宿處。曾一識文。故爾相問。心始帖然。初十日。宿陽谷。覓有民變明旨。旨甚溫。為頌天王聖明也。十六申刻。文枉道抵江村。日將暮。託為公之內昆弟謁鹿公。名善繼。號乾岳。定興人。住江村。蓋公之長子。既不往。非

至戚恐不便吐肝膈耳。鹿公一見泣然相對。囑以鋪堂之事。懇其至親一往。鹿公即

刻馳使邀孫公相議。

孫公名奇。字敬泰。居容城人。

居容城之北。相去二十五里。比至子夜矣。十

七早。會孫公以無可効力。掣蹙相告。先是魏廓翁被逮。吾公曾致書二公以魏事。託之時。孫以兄往。鹿以使往。文曰。魏公事兩家俱得借重。而獨不可為吾公一行乎。孫公曰。正為往而無益耳。文曰。然則魏之鋪堂誰為講者。孫曰。此事最易為人欺。維時有金吾王公名涖。民受恩於廓翁者也。密會公子於某所。公子以是託之。王實私為料理。吾兩家初不能効一臂也。今周因魏而逮。王既德魏。未有不圖報於魏之椒蘭者。意者其於此處一圖之乎。文遂躍然就道。十八晚抵都門。念都中戒嚴。必先得藏身之所乃可。有宗都督者。其父諱禮。於世廟時死。國難先都督因與定交。文與宗氏有世講誼。妄意此可暫為居停。十九卯刻及其門。詭以他事往。求為信宿。於時都督伯子宦遊。惟仲子太醫。叔子文學。在舍。兩君相對。掣蹙告曰。此間大非昔比。即戚里侯門。無不惴惴危懼。倘容非其人。十家連坐。君以異鄉入吾門。比鄰已有密為覘伺者。君其務就逆旅乎。即求一宿且不可。即欲行裝。暫入其門亦不可。不得已。主僕三人反揚鞭長安道上。索客肆而解征鞍焉。于宗氏閱邸報。得周某既已就道。不必深

求之旨。深為公慶。又有密擒首惡之語。又不能不為桑梓隱憂。而見宗氏一番光景。便知京師氣象。於是有五百餘金會票在身。會票無姓名。而所會之家。別有家報。恐存周氏字樣。亟往其家付書以滅跡。念公一到。惟鋪堂一事。最為喫緊。而京師多巨猾。重信恐誤事。輕信或受欺。敢以此事問人乎。必得當道縉紳密為區畫。計非王金吾不可。而苦莫為介紹。又公所囑二三金石之交宦於京師者。其非吾鄉。既難輕謁。而一屬吾鄉。又恐緝事於彼。出沒必得一人馬。密達於與公金石之鄉紳。乃便於時。有蔣士衡名秉銓號台字者。文之通家友也。以貢館於京。遂踪跡而往。蔣士衡密聞斯事。不覺失聲曰。此乾坤何等時。兄奈何自投此地。文亟止勿言。已為門弟子所物色矣。是日即宿士衡館。囑其託侍御王純甫。則王公已奉削奪歸矣。囑其託念陽徐公巖。史顧公併託二公。轉致羅孫諸公。求為助一臂。又求徐顧兩公。問王金吾特為鋪堂之地。其會票金併求二公司之。蓋文生平不敢與人出納。且此地出金。於何作證。一與斯事。生平掃地耳。士衡曰。為此公用情。及轉致數人。兩公之所必然。至會票出納。此必不得之數。文曰。兄弟往商。無妨一問也。是夕與士衡同榻。士衡連起詢問。無非一片熱腸。其館使詐耐屬耳。文力止勿言。士衡不悟。此其家喧傳之所自來也。二十日

昧爽士銜亟往徐顧兩家。文復叮嚀曰：客肆祇可片時，不宜久處。不審兩公能為我旬日主人，俾得暫匿其身否？良久，士銜至，歡然報命曰：兩公正為此公深慮，不虞兄之慨然來也。王金吾亦削奪去矣。鋪堂事，顧公已身為之任，立刻多方覓問，不必再計。所欲致意諸公，已為詳談，不負所託。至於會票之金，入此出彼，於縉紳自屬不便。有吾蘇朱盡吾者，名汝忠，參戎，向固交好於公者也。今以補官將出都門，正有一事借重兩公。兩公為暫留以待，周至了此鋪堂一局，會票即以付之。乃若居停信宿，則斯時覘伺者多。兩公俱以為不可。且囑兄勿往謁。事既粗有板概，遂別士銜而走。蓋吾朱寓以會票交之，因詢有藏身之處否？則指二關之觀音菴。時已薄暮，移寓須俟詰朝。而文寓門以內，朱寓門以外，禁門森嚴，正陽尤甚。一出一入，殊有戒心。求宿朱寓，朱以寢所不便辭。二十一日，留唐元於正陽門外，候吾公至。而文則移於二關道經前門關廟，虔禱得籤，遂決往所指寓。入別朱，適巖叟顧公為吾公事造來，知文在寓，入密室私會。文再懇鋪堂一事，顧出手書相示，正為此事與諸公往返者。擊感而談，不能百餘言。即擊感別曰：弟亦不敢久留，蓋恐為從役所窺耳。是日往菴。二十二日，復造朱寓，呼唐元探公音問。尚屬杳然。抵暮而返。二十三日，唐元至菴云：公使錢真已

至公旦晚抵國門。蓋真中途先行者。有八行相通乎。文曰。爾主人左右皆緹騎。此時初至。正覘探者。羣伺之秋。八行或入其手。執簡索人。吾事備矣。錢真既至。正可託真面復。語不必多。多恐傳誤。今止有三言寄語爾主人曰。定興以無益。不求鋪堂。顧公已身任停妥。會票已交付朱處的當。言之至再。元遂銜命語真。其不直。令唐元將命者。則文既潛身。而公隨身之使。亦相戒不輕來寓。以防蹤跡。特留唐元一人。介於兩間。為通音問計。不欲使緹騎識一面耳。二十四日。遣嚴秀至朱寓。則朱以奉勅不能久留。二十五日且行。召文至寓。以已支之銀。未支之票。轉託吾蘇查君獻可。文復馳往。而士衡適至。同付查君。文約查以五百金。非徐顧兩公命不可動。其五十金。則聽錢真零支。但須取有支票存照。士衡密傳顧公囑公之語。於文語外。復曰。聞厥衛嵩為吾公密遣緹事者三十餘輩。緝其用事之人。兄其善為藏身計。是時頻出入東直門。及往來正陽門外。大非易事。乃特求寄宿朱寓。朱以是夕移樽餞者。若而人。於文不便為解。力為之拒。不得已而始納。究竟無一人至者。一時彼此畏禍。景象可知也。於時朱欲壯文膽。以好語相寬。謂周繆兩家親友。亦有徜徉長安道上者。文不信。續據錢真面述。吳江周祇有四僕。別無親友。其子至德州而返。黃公白安封翁抵京。為

過卒所獲。罄其腰纏六十餘金。猶欲送問。賂以五百餘金。始脫。父且如此。他人可知。朱所教不幾敗乃公事乎。是夕。吾公至京。相違咫尺。不敢走晤。徒有腸痛耳。二十五日回巷中。念菴為車馬往還之區。耳目實繁。當此網羅嚴密。可不幾先藏匿。乃於二十六日走張灣。而與唐元相期。倘有相聞。當於彼地舊關廟相尋。亦蓋吾所指也。二十八日不聞音問。乃遣秀入京探聽。是時特為民變一事。萬分過計。走書查君獻可。囑其豫備後事以待。惜也。查君惟望其生。以為必不至此。烏知究竟至此也。二十九日嚴秀至。始知公已於二十八日受刑。僥倖無恙。是月無三十。乃於五月初一復回二間。而唐元來寓云。已坐贓銀二千兩。計無所出。有兩泣泥首大士前而已。是夜竟夕不寐。則擬先作書寄報房。遠知家中設處。而遣元歸。為齋來京。會票計。又恐別有差失。則叮嚀填寫查蔣二丈面免。非此二丈。不得擅支。以寓其隄防。然自北而南。自南而北。遙遙數千里之程。又無中生有。處此多數。夫豈易事。大約以五十日為期。倘公五十日之內。緣此而斃。何以自解。乃擬身走定興。乞鹿公轉貸。以應一時之急。乞孫公昆季入京。預備後事。以防不測。謀既定。初三日。方遣唐元發報房書。是時會票金已他屬。欲染指者。不無垂涎。而錢真忽至。以處贓金為名。苦促文歸。且曰。此公意。

也。厥衛緝訪果有其人。且五十餘輩也。因出公與真書。有火燒速去之語。蓋文居火燒坊下。故作隱語。且曰不歸。恐有奇禍。文念此行實受公生死之託。即有奇禍。亦是數應同盡。乃若斂金。自有異度。文起諸君子在。而須文往為復念公瀕行。其相託何如鄭重。乃忽於此時反命之歸。意必有悞之者。因問我有三言傳語。曾一一達爾主人否。真即隨聲以應。乃曰。主人甚怒鋪堂。不敢回復。已而命唐元將文之言。復告於真。令其止達二語。不必提起鋪堂。真又不欲元歸。大有相角之意。文苦口曰。斯何時也。而暇脩一時之怨為也。且彼此歸。專為賊銀一歸。即來酷日中往返五六十里。較之安坐旅邸者。甘苦勞逸。莫啻霄壤。予何所庸心於其間哉。因悟真與元不睦。遂不免翻異其間。應歸而不使之歸。併前百方促文歸。蓋有全非公意者。為作色不怡。真乃唯唯。又與語及欲往定興一節。真又以為不可。大指以前既虛往。再往何益。而且為公語以阻之。然鹿孫兩公文所得於觀面。知其曩之不來。蓋屈於勢。而情則有餘者。非忍也。乃堅持欲往。是日兼聞賊金復加一千。五日一比。初七起限。當此之日。二千且不知於何措辦。豈堪更加。為之苦極。初三錢真別去。初四早。唐元持錢真片紙。留文往定興。而命唐元往蘇。云此徐公意也。當即達知主人。噫。文未嘗歸也。而又何

有於留乎。是早三人從二閘發。足彼時文付唐元達諸公書。皆為隱語。不敢明言。蓋恐為遲卒所得耳。而錢真不知此竅。直以公與真書寄歸。凡諸隱語。詳為訓詁。文有難色。唐元曰。請留在便可齋。則齋倘有他虞。即刻毀去。何如。文勉為之應。不敢入便門。出張義乃取城外他道行。行不二十里。即有番卒三人叱下騎搜檢。是時急甚。文與嚴秀先以行囊與此三人一一簡視。而更以他語支吾。唐元則乘此隙。將前書嚼去。毫無蹤跡。乃免於難。噫。亦危矣哉。初五日午刻。抵涿州。遣元歸蘇。而文則分道走定興。初六至鹿公所。鹿公一聞文至。不待通謁。即趨至門外相迓。告以乞為轉貸。應一時之急。併辦後事。以防不測。公於轉貸立為首肯。其於後事。則以為事不至此文。注然曰。有備無患也。鹿公領之。立刻馳使邀孫公。孫公至。便立刻召兩家金石之交。分道問金。蓋孫公之貧。不減原憲。而鹿公躬耕自給。別無長物耳。次日。鹿公顰蹙相詢曰。有如公或不諱。此金得徵徒納乎。文曰。公即不諱。賦無不完。是周民必出之物也。文請自立一券。吾公得生。吾鄉金至。固立償而去。設有不幸。文自在也。其忍負公。公笑曰。事不得不詳問耳。安用券為。正爾先為貸計。續商後事。乃初八日。忽聞初六京師王恭殿地雷之變。嗣閱邸報。而知是變也。地裂一十三丈。火藥騰空。不焚寸木。

而傾覆屋宇以萬計。壓斃男女以千計。聲震宮闕。為今古所未有。朝廷備省定刑之

旨。且先後下。則妄意吾公不死矣。遂置後事不講。而揣心稱貸一事。彼地涼薄。富家

絕少。又非素所往還。難以告急。一時不能輟集。文則此衷急於星火。然不敢形諸齒

頰。蓋恐急則數不及額。非特來一番意耳。踰旬至二十日。始得三百金入手。二十金

定興令王公名永吉無錫人所助。五十金乃鹿之姻家羅公名萬因知其棄產。往貸二百。羅

以五十應。且云不必報復。鹿公則以貸而得助。與自至之助不同。仍應作貸。又五十

則諸君子賻左公浮丘奠金。未入左囊。而歛存孫公處者。其八十。則孫公之親某

不問子錢。而以其本緩急者也。其一百。則賈人某之母錢。月索利二金者也。共三百

金。未付金前。孫公已知文非內昆弟。第見文肫懇。乃不他慮。而直以金付文。因借鹿

使一人護行。蓋吾輩書生。非得幹僕左右。恐為多金所誤。且使兩公知此金著落耳。

公以老僕趙姓者往。二十一早疾馳。是晚宿琉璃河。聞是日朝天宮災。無端起。火正

殿悉焚。不兩旬而兩以災告。何天心仁愛至此。二十二午抵京。入國門。門稅較之前

月。忽已加倍。氣象更覺刻急。一抵寓。立刻齋金付查君獻可。名口口太學生查君問文於何

寓。文不為告。蓋此金之司。有苛求金之所在者。查君若為金穴。亦在羅網中。前金之

交查君亦有難色。恐其知文寯。則我能往。彼亦能來。必為完趙耳。即坐查寯。呼周使
一面。周成至。詢知公禁中起居稍慰。問前者票金。正於二十七日。一限將完。來金適
承空之。此後便有鄉紳助金接續。文據似可少弛。先期再四叮呼嚴秀。勿引諸使來
寯。為人蹤跡。乃秀於是日乘文在查寯。反飲周成於文寯。愚人不知利害至此。文之
不為番卒所獲。特天幸耳。是日欲發八行候公。不取。特索公與錢真手書。見公十八
九日之書。欲差周成回蘇。催銀甚急。二十三日。文復作書寄報房促金。是午走將士
銜寯。知曩者明旨。所云漏網巨魁。意有所屬。為之大駭。竊以是時文之往還。更為稠
密。益不勝惴惴。而士銜復曰。兄與某同姓。一為番卒所緝。其禍叵測。不可不慎。文心
感士銜愛我。二十五日。遣鹿使趙姓者歸。勞以白金半兩。堅辭不受。曰。公所處何時
而敢領耶。主人知之。寧免督責。不與主人言此金。如沒公之德何。斷乎不可。比屆行。
又私語嚴秀曰。金雖不受。歸必達知主人。以表朱公之意也。嗟哉。此使其真使乎使
乎。是日。嚴秀道經錦衣衛。見黑氣一道。從衛前起。直透空中。風不能動。因知二十四
日。亦有是氣。不可謂非大異事也。二十六日。始得公與文手書。慰勞外。以吳橋之行
見委。然不言吳橋。而第云有一遠行。不審可否。得錢真字。而始知為吳橋也。於時第

以公急贖金。且天變後定無死法。可以暫離。乃立刻作書奉復。且云矣止吳橋。凡可
効力。不妨多委。更不必惜文之勞。乃於二十七日。得公與范公鹿公兩書。鹿則文得
於覩面。故曩者之往。無煩再計。范公初未識荆。且錢真面傳公旨云。范與張侍御為
姻家。張與公曩日相左。書可投則投。不可投。寧持回不投。勿生多事。文計京師去吳
橋。往返一千三百里。委身於不可知之域。而念業已許公。難以中止。正徘徊間。二十
八日。聞皇極殿前墻石費帑金如千。經年累月而始至者。大工方待之告成。甫及殿
忽斷。都人駭傳。一月之內。災異頻仍。意當事者必為動念。吾公萬無死法矣。二十九
日。錢真始遣周成回蘇。是日往別查君。適顧公舊西席王君原裕在坐。偶語及公。謂
從公來京之使。喧傳六人。且曰。此六人者。徵逐酒食。猶似居恒時。倘廠衛緝知。不以
清吏相目。敗乃公事不淺。兄可不思善為之計。文因悟公使三人。曰錢真。曰顧選。曰
周成。三人者。原寓錦衣衛鄰近。以便承直。公入獄後。錢周兩使留顧選於舊寓。而兩
人移玉河橋。與吳江周公四僕同寓。既同郡。又同姓。誤傳公使六人所自來也。公使
俱儉薄。豈其有此徵逐事。但非分寓。何以自解。乃於三十日。晤蔣士衡。詳語其故。囑
士衡轉達徐公。令之分寓。且託之風聞。不直告徐公。以語所自來也。是日午刻。即出

都門居京旬日。逆旅主人見文謝絕賓客。而又與周使時密語。業有猜意。疇昔之夕。已有長髯居然闖入。四顧其行裝者。時公與范鹿兩公書。文先期折成指大糊之壁間。用是無恐。是時屈行。償主人日費。嚴秀計。及秋毫。主人幾出猜語。文乃解行裝一事為贈。以愜其意。始釋。六月初一。抵暮至江村。晤鹿公。以往吳橋事商之。鹿公擊節稱善曰。此天下第一流人物也。徑往勿疑。至於侍御。為姻家金蘭之誼。豈為葭莩所奪。必不其然。無相妨也。因求公一函介紹。立為首肯。訝無公書。文曰。書中無非致謝語。范公書正在俯仰間。與公書有金且有數。恐為禁門搜去。大屬不便。已付祖龍。即范公一函。折成指大粘之。敝襪底中。持至不易也。鹿公唯唯。初二早。呈范東於鹿公。時鹿公子孝廉名化麟字仁卿在側。見書不署名。不填號。曰。此東無范年伯字號。得微以與吾父者。移之范乎。事若却握。奈何。父書似乎難發。文少遲進曰。前與公書。有雷霆雨露。無非聖恩。今與范公亦有此語。寧有與一人書而重複者。請以前書同此東函去。則較然矣。鹿公徐曰。我東自發。前書不必同往。總為至矣。未為不可。噫。公之肝膽何如哉。初三早。鹿公發乘。是日以初二日大雨。瀟水難行。乃於初四日發足。便道過孫公。以己意私懇孫公。致意於鹿。求其再多方一處。孫公唯唯曰。因前鹿公原欲以

五百金相應。措處不及耳。是日。即宿孫公家。初五寅丑之際。地大震。文卧炕上。幾為墮地。已而知是日京師亦震。蓋震者千有餘里。蒼蒼之做戒何如。文生平不慣鞍馬。前者長途。每日馳驅。不能五舍。至此炎威日熾。僅行一百餘里。途中遇泉。飲之不啻甘露。行至初八。始為張蓋。蓋為一手執轡。一手執鞭。僅僅支吾。至此暑極。無可奈何。乃為棄鞭擊蓋。煩苦可知。即欲求如曩者之行止於鞍馬之勞頓。不可得矣。苦楚中時時作想。不幸而生於三韓發難。彼時逃竄。惴惴恐有兵刃之及。莫必其命。求如今日。豈可得哉。則塵勞為之頓忘。因自笑。此一想。真一貼清涼散也。初九早至吳橋。謁范公。名景文。號質公。景州吳橋縣人。先以鹿公書往。鹿書中亦不明言吾公也。第云與文同年同官。弟識其手書甚真。末則云。一腔心事向誰說。令人徒憶平原君。書入。范公急索書。文曰。書非面呈不可。因問書係何人所發。文以公對。其使即感額曰。我主人正為公焦勞。苦無音耗也。亟延入。曩文之謁鹿公也。不覺酸鼻。因其使者相戒。恐傍人窺伺。淚為之忍。然彼時之淚。猶能相忍不下。獨至此。則淚如湧泉。不能復禁。蓋與公就義之期。不能數日。神者先告之矣。范公相對泣然。不能為情。良久方出。公書書中所懇。乃為賊金甚急。求為轉貸。覽畢。即曰。此項自是友生事。敢不殫力。即命移寓別業。因識

其西席康用舟

名允濟
選貢

兄曩文之寓鹿氏也去京二百餘里鹿之北閭無非閭官主

僕二人深藏如處子不敢一窺戶外至此則去京幾七百里矣范公亦相戒勿入市

中噫世道至此真可畏哉初十早范公走使趙姓者將命許貸三百金而令文回鹿

公處候金蓋文與公無一面所憑者吾公之片紙所信者鹿公之一函金送鹿處在

彼出納始有著落深服范公作用之妙是日宴文又識其西席李仲昌

名應期濟
南臨邑人

蓋康課其族子館於別業李課其長君

名元起字君平
年十八已廬

館於家二兄俱篤行君子而

李更饒意氣私慶得朋云十一日范長君奉公命先施聞此兄於朋從一切謝絕惟

有閉戶請書而得一再交臂即其師仲昌亦數為異數十二日入別知范公已有東

為吾公求援於東光蓋東光乃時局中要人居相去祇二舍因留候回音前文初至

公便詢及張侍御按蘇與吾公齟齬之事且曰近有東人京曾以蓼兄事為託語語

見報而獨此語未報想忘之耳必無芥蒂理文念侍御與公為姻家不敢直達至是

已悉公肝膽遂直告曰侍御萬分芥蒂近日京師一聞民變便揚言曰聞此事乃周

公子所為糾眾抗旨大是異事諸紳相顧錯愕不敢發一語時徐公念陽在坐獨抗

言曰周子年未弱冠能幹此許大事耶方入蓼洲於死地又坐其家以族誅烏乎可

芥蒂可知。望公力為之救。范公駭然立許解紛。因問金至鹿處二十前後不遲乎。文屈指曰。金之比五日一限。每限百金。可以支吾。自六月初七比起。前有會票五百。已完五月之事。今有鹿公貸金三百。併吾蘇及吾公知己之宦京者。聞可得五百。計可支持至二十左右。不為遲也。范公領之。蓋知公之金。問之他人。他人為政。一迫便不能多。不敢聊且塞責。且屈指扣數。自是如此。初吾公手書稱文至處。而文亦以內昆季自居。且更姓名為余。至是見范公真情意。懇便以實告。公為再三歎息。因以蘇郡人物下詢。矢口而對。與公疇昔所銜。頗相符合。公復垂詢。兄往還定興。彼地有楊椒山先生祠。漢張桓侯翼德故里。曾一謁否。文過兩公祠。曾默以吾公生還為禱。幸無虛公之明問。因自念忠臣義士。令人景仰若斯。真雖死猶生。烈烈千古。吾儕可不知所以自勉哉。十三日。再別范公。見東光回東外。兼得與使者口傳之語。許與諸要人處。緩頰為之欣慰。臨別。文正欲泥首以謝。乃范公先呼童設筵。曰。同為友朋。而兄獨任其勞。敢不再拜。為之稽首。文不勝惶遽慙愧。別出。鹿公之趙家幹。已奉公命至矣。蓋文為貸金。非得護行者不可。先期與借。至此來耳。不虞范公自為遣使。虛其往返。范公復以程儀二金為贈。文既仰其貸。又拜其貺。不可。乃堅辭。使者三為往返。已而

仲昌移樽相就。使者以公命乞仲昌一言。文直告以不敢拜之故而仲昌猶相強不已。文乃曰。請留公所。為歸途壯行色不可乎。乃止。十四日。從吳橋發。足天既熒甚。又計金至之期。尚有數日。乃從容徐行。十七宿雄縣。是夕夜方半。文臥室之門發異響。如捶擊。急起四顧。寂無人跡。惟明月滿庭而已。為之大駭。自離故鄉。絕無音耗。而出門時。次子病甚。且為民變一事。罪罟方張。深虞波及。則以為文家必有他故。寧知吾公之變。正於十七之早。由斯言之。非公之英爽而誰也。痛哉。十八至容城。過孫公。是時文之出入京師者再矣。自聞渠魁之事。十分戒心。當此邇卒密布之日。曾幾何時。而禁門頻出。頻入。恐為物色。宜留此行。以防公之不測。且吾蘇之金。或不及數。鹿公處畢竟可為曲處。前已露意。孫公所宜潛蹤靜聽。而齎金往京。非得一的當友不可。乃懇孫公。慨然應允。議其弟啟美兄。名奇。彥號思堂。遵貢。往。且曰。此間多中貴。亦有一二相識者。此行兼可一詢其中喜怒。則私心益慰。十九至江村。二十一日午刻。范公使者齎金二百至。不能如三百之數。迨文歸途。謁范告以前約三百。蓋為某二千石。曾戴德於我。可貸不虞。竟虛所往。乃不得已。託李仲昌叩之中丞王公。名洽。山東臨邑縣人。得金一百。又叩之某某。湊金一百。不啻沿門持鉢。殊不自慊。是日克封范公金。鹿公復出金

一函計三十兩曰此止生茅君助金也二十二日孫啟美兄偕鹿使趙家幹暨嚴秀同行往還之資乏已叮呼嚴秀乃鹿公則命趙家幹齎金支應孫兄又堅持不可主僕二人已具有資斧推讓良久乃議各自支給孫兄亦貧與公未識一面既任其勞又損其素瀕行文向孫兄稽首以謝曰此弟之事以累吾兄敢不拜送前文之往吳橋而過孫公也孫公私語曰兄之至江村者三矣彼地鄰近俱中貴不可不慎昔魏公子之來亦各處潛蹤無定居也兄此回有弟椒蘭某某俱可暫寓兄其圖之文心妄疑或者意出於鹿而命孫轉致耳領之是時因向鹿公請曰文其移寓以防蹤跡乎公之封翁成字公正名毅然曰疇無友生患難相依情理必至而煩僕僕轉徙其安居勿動噫文此來凡知其事者皆以不祥人目之惟恐或近即信宿亦人情所難乃不嫌暱就若此令人稱交誼輒云肝膽膽之一字妙矣哉蓋非有膽則惴惴惟恐禍及即欲全此一段交情不可得已於時文為盛暑積勞所苦身既病熱腸復病寒日僅一餐困頓殊甚方服藥餌偷安牀褥乃二十四日午時嚴秀奉公訃音至矣自天變疊至聖心修省以為吾公必生故吳橋之行敢於身往不意忽有此變為之痛極不覺失聲於鹿公之堂鹿公相顧錯愕恐左右傳聞乃為強忍飲泣嚴秀云公之喪

已於二十二日之張灣登舟矣。文計錢真未必待我。哀痛之際。一切都捐。則欲真走吳橋以候喪舟。少展護喪之念。蓋吳橋去桑園一十八里。桑園者。南北舟楫之所必繇。於此相候甚便耳。痛少定。徐請將士銜來。乘則傳念陽徐公意。召文入京。而鹿公亦向文問轉貸之金。作何區處。是時范公及茅之助金。嚴秀與趙使已復齋轉。文已交之鹿公曰。轉貸二百八十金。今有茅助三十。范公所貸二百。先行交納。尚少五十。再作區處。范公之金。文自於京中問公助之金。償之何如。鹿公曰。二百自是賢翁之金。予何敢過而問焉。聞前者此處之金尚未用。予命一价相隨入京。齋回原物可矣。文曰。前金必用。文所知者。祇元寶一錠。不便於納。託查君變易。或此猶存耳。數刻中。公三問而文三以是對。不知未用之語何從而來。已而入京。會將士銜。文為述嚴秀報訃。弟急索兄書。秀以烏有對。連索而堅執。烏有。弟作色曰。將即不發書。汝獨不可立索片紙以報我乎。如許大事。而僅憑口傳數語。懊惱良久。已而見秀手中片函。則兄書也。蓋是時秀痛其主。形神俱喪耳。士銜因笑問嚴秀曰。若臨行。我曾密語。尚有存之金。可來取去。亦忘之否。始知用存而誤傳未用。此語已忘於嚴秀之口。而先入於鹿使之耳。故頻煩鹿公之問耳。阿堵一物。易起猜疑。可輕與哉。是日。范公之金

記鹿公轉璧。而以茅君助金。先清鹿公三十。帶鹿使偕行。以便償金。力疾起程。鹿氏父子祖孫暨孫公。見文不堪之極。強相寬解而別。二十七早入京。先會孫兄。約其攜金。蓋孫兄尚留京也。隨偕蔣士銜謁念陽徐公。而知吾公十六日尚健飯。沒於十七之昧爽。屍出於二十一日。喪發於二十二日。入殮。惟顧選一人在。而錢真則有候之舟中而已。四體五官幸未全壞。第面似有物壓之者。鼻為之平。已不可認。惟指與手足。為血肉不能變處。則顧選猶能識之。所備之衣。已不能服。第安置棺中。噫。文此來。雖妄意公之生。然出門時。原意公之必死。祇為躬親舍殮計。故有此行。所以報吾公者。此所以慰公之孤寡者。此初不為處金來也。乃竟大負本懷。徒令顧選一人。結公之局。出門之意。謂何痛哉。隨以鹿公之貸。商之徐公。公曰。有鹿氏原金一百。存查處可償。文曰。此外作何處分。意者其公助之金。一為取償乎。徐公以無存對。文又曰。意者其續到會票之物。以踐宿諾乎。徐公亦以為不可。噫。斯貸也。非助也。雖鹿公義當有助。然寧我以金如數往。鹿公以心之欲助者。卻其如干以歸我。則彼此兩盡。今逆其欲助之意。而聽其多方借貸。竟自償補。夫乃非所以自處乎。於時資斧已罄。告急於公。蓋文之來也。文與唐元嚴秀各持十金。唐元十金。已於四月十六至江村用盡。

文之十金。為唐元支去六金。乃以文自有一金。復支查處會票五金。湊足十金。併嚴秀者共二十金。自四月十七用起。頻往頻來。車馬餼糧。一切犒勞。種種訪費。咸於是取給。至此無復存餘耳。是夕即宿查寓。士衡曰。即動鹿氏十金。為兄資斧。不可乎。文曰。償不如數。方切媿心。其可復損百金之內乎。計歸費須十金。弟自有一金。而范公處有不受二金所必餽者。今得於徐公處稱貸五金。便可勉強就道。乃書五金之券與士衡。二十八日。孫兄與士衡先後至查寓。士衡擲回昨券。而以徐公命。於查處支

十金。

此十金之支出自徐公。文不與聞。隨付嚴秀。

付文為歸途資斧。意者其續到會票之物乎。文即分一

金。密付孫兄。以勞鹿使。且囑其俟至良鄉村之。恐其來望耳。隨交與孫其五十。果元寶一錠之未用者。其四十九兩五錢。則曩留為吾公零用之金。而非鹿氏之金也。曩文之稱貸於鹿也。原無片紙。至此不敢不以一券為信。乃書一百五十金之券。封致鹿公。與孫相別。仍泥首以謝之。便為趕喪之計。於徐公處。知公使於二十四日尚至徐寓。於查君處。知公使於二十六日尚至查寓。蓋一為買漆。一為欲與吳江周使偕行耳。計喪舟不遠。乃從水路趕喪。奈二文方別。大雨如傾。周行半成巨浸。不可行。是月無三十。閏月初一。馳驅泥濘中。抵張灣。聞喪舟已發矣。復為疾馳至此。則泥濘轉

為滂沱。求其馳驅。不可得矣。有匍匐於滔滔已爾。是夕抵河西務。覓喪舟。了不可得。方謀兼程趨事。乃初二晨起。水已徧於街衢。男婦老稚攜篋而逃竄者。已載道矣。則移寓高阜。不一日高阜之寓。水復浸淫而至。恐不復免。則求附運艘。幾有性命之憂。初五日。水勢稍定。乃附舟至天津。舟中有揚州運軍。云於二十九日。于河西務見有二喪舟。乃南艘相並偕行。其為公與吳江周公之舟無疑。噫。喪舟而肯稍為我待。不二日。文已至矣。初六日。從天津附往德州之舟。水勢逆甚。竟日不能二舍。十一日。復登陸。十二薄暮。至吳橋。別范公。蓋意喪舟過桑園。必入問范公。范公必為我留。不虞音信之杳然也。甫及門。知范公聞訃之曰。正欲開宴。一閱邸報。不勝痛。為徹宴。抱疴者累日。入謁。相對揮淚。且稽首稱謝。文不勝惶遽慙愧。曰。文不能視含。大負周公。乃公之罪人。反加禮耶。因告公以前金下落。且悉周氏之艱難。及鹿公之通負。意欲公俟金至。稍割以償鹿公。公於文一語。一為悽然。知其於此金必有所助。十三早。仲昌來晤。文以情懇之曰。前金旦晚且至。質翁大有割助意。而鹿公轉貸。尚有一百五十未償。倘得隨公之所樂助者。即以償鹿公甚便。兄其為我圖之。仲昌曰。兩家之物。皆出於貸。鹿公欲償貸。則吾公亦欲償貸。恐必不得之數。惟是直捐以助周氏所樂。

從耳。文大為首肯。是日赴公飯。未半。鹿使二人已齋金至矣。飯畢別出。鹿使納金。公不納而亟召文。欲盡付持歸。文局促曰。周固不足。公非有餘。稍割則可。其可全捐。而以此重適為公累耶。公感額泣然曰。所處固不足。然弟幸有此身在。猶易處耳。文曰。公言至此。不敢辭矣。但二百金。數不為少。長途或有他虞。親齋斷乎不可。公其別致。公乃止。初文之為水阻道也。深悔奚弗從陸。取道良鄉。涿州。便可刻期至桑園。候舟。胡乃自為水苦。詢鹿使以孫兄出京光景。始知孫一出京。至盧溝。民居已漂沒殆盡。沈浮五日。始達江村。主僕三人。幾於不免噫。斯行也。伊誰之事。而乃以累孫兄至此乎。而文之得免於難。不可謂非倖。鹿使之來。璧范金者。其一人。仍昔之趙老家幹也。往返於京者。凡三。往返於吳橋者。凡兩。屈指程途。三千有餘。矧炎月尤為不易。前者區區一金。何足少酬其勞哉。十四日。入別范公。眷眷一飯再針。不能為別。濱行。文再拜稽首。公起執文之手曰。弟亦有四叩欲申。叩曰。弟相去數千里。徒有其心。不能為力。兄與咫尺。周氏諸孤。所望朝夕一顧。文為泥首受命曰。綿力所及其敗。自愛噫。范公於友誼。真千古一人耳。流盼曩者。將命之趙使。見其形容骨立。詢何以至此。則以曠昔東光之行。刻期報命。為中途暑雨所中。方爾抱瘧。斯行也。不獨諸君子竭其心。

思。即諸君子之僕從。亦殫其筋力。真足為友道光。別出范公以前二金為贖。文乃不敢復辭。使者復傳公命曰。所處二百金。既不持去。不得不一歸原主。倘收當再為設處。蓋金非已物。公自有微機焉。非有他也。是日原擬登途。而日已昃。騎且無可問矣。仲昌用舟。各治具。強遊公之小築。以一解文之悲哀。然杯在手而痛在心。時時彈淚。殊不成歡而別。十五日發足。是時妄意喪舟經開。必有稽留。且從此至分水龍王。水勢俱逆。而我以騎往。必可追及。則為策蹇而馳。十六至荏平。是夕復大雨如傾。水復阻道不可行。留荏平者兩日。十八發足。每行不數里。非深泥則巨浸。稍淺則以騎代舟。稍深便以足代騎。裸形匍匐。嘗此一番生平未嘗之苦。即欲求如曩者之行。僅止於炎熱。又不可得矣。又每作三韓被難想。於滔滔中。如乘安車。如坐夏屋。忘其為困頓也。此一想。又真一貼逍遙散哉。自吳橋發足以來。馳驅跋涉中。念范公之金。一歸原主。或不能如其前數。又念吾公之家。舖糜不給。梵梵諸孤。以養以教。以婚以嫁。良非易事。目前贖金雖急。然當人心哀痛之際。自能勉強竣事。必不至累其孤寡。獨是日後教育等事。大屬難處。雖吾蘇好義者不少。然當此兩番大助之後。豈堪再助。即有金石椒蘭如文姚太史諸君子。均非有餘之家。豈能種種仰給。此年年苦楚事事

艱難之局。而子姓失學。併失其先人故步之根也。賢者之後。以空乏二字固其窮者。幾人必得置一恆產。乃為永遠計。前金二百儘足為一項謀。而讀范公所惠窳議諸書。見公於宦遊。每遇凡可經久事。不遺餘力。間有捐已俸為之者。則斯議也。惟公可告。乃以前意作東。從逆旅主人寄范公。二十二日。至濟寧。詢之閘上。則喪舟又已過矣。沿途阻礙。使文不得登舟一護。少盡其心。何天之既我至是。是日遇公使周成。自北而南。與之登舟偕歸。三十日。舟泊黃河。一夕中。盜之來劫者三。幸客眾豫防。不能登舟而止。因自幸范公之金。堅辭不攜。不為過計。七月初一。登內河之舟。是日午餘。颶風大作。幾為之覆。倘在黃河。寧免於難。幸矣。幸矣。已而聞是日吾蘇風更甚。數百年合抱之木。有為平折拔去者。不可勝數。蓋公柩至蘇之第三日也。天怒激發所致。曹其然乎。初二。復為颶風停舟。初九抵暮。至吾公家。登其堂。不見其人。初十日。憑公之棺而哭。不獨痛公之死。蓋痛公死而不得視含。公則大有造於先慈之苦節。文則無毫毛之益於吾公之死也。諸公于方遵曩日吾公之命。以伯相呼。為再四辭謝。雖諸公子奉公命相稱如故。然於文祇重其愆。所謂耳受而神實不受者也。是日歸家。幸得舉家無恙。而病子呻吟於牀。然阿翁已歸。自足相慰。乃僅聚首百日而亡。痛哉。

諸兒為述閔月二十八日之更深。有鬼嘯於庭者三。其聲甚厲。意周公之喪已歸。詰朝往詢。公極果。於是夕至家。公實相報。有何疑焉。十三日。以一杯哭公。而詳在京之事。名九京報命。復之吾公。隨以資斧三十金。費數。交公之子子佩。兄且言。范公當有後訊。八月二十二日。范公使者齋奠十金。至蘇發函。深是文恒產之說。約以明春付金。因聞王中丞之金業已收去。念范公橐中甚窘。乃致書李仲昌。囑於中丞處從史其間。蓋仲昌與中丞為椒蘭之好耳。或謂范公此金。異日即以清虎公。於計甚便。噫。文既倡恒產之說。而范公慨然以為己任。則此金者。乃范公為周氏諸孤長久計者也。若虎公之金。定當另為區處耳。豈可以游移其間。以負兩公意哉。譜至此。而北行之事畢矣。噫。公之被逮也。萬姓為之號呼。至捍法網。喪其元而不顧。公之就獄也。天地為之震怒。奇災異變。先後疊見。夫豈細故。公之已沒也。洪水滔天於京師。大風刮地於桑梓。為百年未有之災。天人之際。一至於此。則公之為公。何如。乃痛公之深者。或以等死耳。奚弗自裁於蘇。乃多此緹騎贖金之費。而投其身於至慘之地。噫。公何入乎。肯泯泯而死。自同於匹夫匹婦之經溝瀆者乎。故關真君之籤兆。每為勸駕。非不靈也。正欲公之烈烈而死。以奇節與公也。此豈尋常所能測哉。乃若吾公聞逮之

詰朝橐中所存白鐵不能一兩。以三錢莫貧交徐亂開。以二錢買桐油為繼晷資。謂其價稍廉耳。以燈火之需而計及於此。其家之貧可知。比晚聞逮。所付公子之金。僅四錢耳。問營家之產。僅僅半頃之污萊。問棲身之所。僅僅數椽之陋室。五年司理。數年銓部。而光景若斯。吏之廉。未有如公者。乃能償贓金二千耶。藉非吾公之品。吾蘇之義。則公之孤寡。有為贓金立斃耳。斯民自有直道。千載自有公評。可不具論。聞吾公為獄吏拷掠時。見其刑酷甚。則高聲呼曰。爾不畏天地耶。奈何必欲處吾輩以死。且天下忠臣義士多矣。從來翻日後之案者。正不屬目前之所忌也。非謂吾輩死而天下遂斷忠義之脈也。公所謂教之誨之者。其在斯言乎。且捶且詈。愈折愈奮。被逮諸公。無能比其烈者。噫。味斯言。一時挺然不屈之光景。又豈見聞可得一二哉。猶記公公署候行。燈下朗吟于忠肅公粉骨碎身。渾不怕。獨留清白在人間。及楊忠愍公風吹枷鎖滿城香。諸詩津津有味乎。其吟之神。若為之彌壯。氣若為之彌揚者。公於臨難激烈。乃爾。豈非真正奇男子。壯哉壯哉。公之構禍。固由於與廓翁聯姻一事。而倪文煥首逢璫惡。後更有陰為之構者。然閩緹騎之逮廓翁。廓翁飲之虎阜。緹騎且從虎阜解維。廓翁為聯姻一事。欲姑為一日留。緹騎難之。公大叱緹騎。而且語侵魏。

賊復曰。若其直致我語。余非畏死之人。噫。捺虎頭。覆虎尾矣。奇禍之至。何怪其然。非吾公斷無此膽。聞公於被逮之夕。縣令守於廳。妻孥哭於室。公拜辭家廟。從容取筆。為僧題小雲題額。此其神情之定何如。不死於蘇。死於都。真知所以處死者矣。吾公之抵京也。以四月之二十四日。公之入獄也。以是月之二十八日。未入獄前。處東司房。彼時諸縉紳。無一人敢至。而諸旗則左右惟護。蓋諸旗中途聞京師以其需索激變。將如周繆兩家追比詐金。曾於驛中密室環跪以前金完璧。公則仍以授之。誓不洩一言。故感激若斯耳。二十八日。另有一旨開讀。開讀畢。裸形加緋。以解理刑。一至理刑。彼時即公侍身之僕。俱不克覩矣。聞公於理刑。陳詞侃侃。聲振一堂。撻棍四十。繼之以夾。水火棍六十。又繼之以撻。參校一百二十。誣坐贓金二千兩。續奉嚴旨。五月初。又加以夾。復誣贓銀一千。公至此不死者。亦幾希矣。續有非常天變。刑為之停。比至六月初旬。又撻十棍。數雖少而慘更甚。十六。公猶強節。十七子丑之際。不知用何物。鎮壓公首而亡。動手者。則鎖頭顏紫也。聞楊左諸公之死。皆出此人手。願選每日送節。與獄卒頗狎。故得其情實。乃爾。不敢不詳誌。以記彼時之慘毒。公之德容。襄公堅不欲寫。有公門弟子龔兄名汝虬者。知不可明告。即於候逮之十七日。私攜丹

青君王明谷。從旁私窺。圖公貌藏之。其肖持甚。不惟俾公之子若孫有所瞻依。且使吾公之容。異日與諸名公之像共垂不朽。俾後人有所寄其高山仰止之思。亦似有死意。此皆吾公之事。所應備記。故謹附錄於此。是役也。鋪堂一事。全賴巖叟顧公。與所出往返書札。為給事足吾陸公。而京師斂金。實惟念陽徐公。當其時。縉紳先生。靡不以公為諱。不敢齒及。徐公獨奮身綜理。而且侃侃於張侍御。為公之子力爭民變之事。今日徐公之削奪。所自來也。若文一人。既不敢及顧徐兩公之門。非得士衡轉達其間。更從中為之料理。則文有束手無措而已。赤日中往來長安道上。分憂共戚。士衡一人耳。乃若蓋吾朱君。雖艱於文之一宿。然非朱君。安所得查君以為出納之地。查君者。以太學待選於京者也。司此一項之金。大非易事。而查君能任之。非獨千金之託。毫無所負已也。吾公之僕。自顧選而外。則有唐元特為贖金一事。銜命而歸。溽暑中四十餘日。往還六十餘里。視後使周成。幾兩月。而纔返半道。勞乎不勞乎。嚴秀偕文出入。其勞可知。而錢真者。雖多所不便於文。然遍叩諸公之門。及入獄比納。亦勞之不可泯者。此俱北行之譜。所應紀也。乃若吾蘇斂金。實惟光祿卿具茨毛公。與異度文起孟長德升諸君子。文之遺唐元歸蘇而索金也。屈指往二十日。來二十

日。欽金十日。尚虞不能及數。乃元以端陽日。從涿州歸。於六月十六日。已持千金之票至矣。又十日。念陽徐公使者。又齎有五百金之票至矣。是時有原齋會票五百金。京中縉紳所助五百金。范鹿二公處有五百三十金。已有一千六百。而得此兩項之金。且浮三千之數。倘其時而無必欲死公者。完贖之日。送刑部擬罪。明旨昭昭也。六月終旬。自足了局。諸君子寧不大有造於吾公。聞文先生之言曰。明知贖之完否。初無救於吾公之死生。但公倘為追贖而死。則吾輩之痛。更莫能自解耳。然當緹騎之至也。所處已二千金。茲復處幾有二千。吾蘇之好義。亦已至矣。苟非公家赤算。真無可質當。無可變賣。絲絲取必於助。亦安能感動如此哉。被逮之始。縉紳與諸好義者。爭為助。諸貧士。則請以本府季試三學諸生例得賞金。全捐為助。而諸廩於學宮者。則請各捐一金為助。一時好義光景可知。而彼時司出納者。實惟楊兄名大深。暨張兄名我城。當民變後。人俱畏禍。至有前曾出金而亟求削名助籍者。而張兄能以為己任。不避嫌勸。若為公而死者。實惟顏佩韋。楊念如。周文元。馬傑。沈揚等五人。聞佩韋念如臨刑。了無難色。挺然曰。我為清官死。死有餘榮。寇公祖名慎洪 西人。陳父母名文 瑞福。建同安人俱為流涕。陳父母者。老於諸生中。公為司理。特拔之進棘闈。因以門弟子自居。

公之被逮。左右周旋。實惟寇公與陳公。是賴。非兩公。恐即欲赴闕。未可必矣。蓋當時人情危懼。當事者惴惴以公為覺府。既恐為旦夕之留。又恐連目前之禍。惟有支吾觀望。以冀一時之無事而已。委婉調停。惟兩公是賴。至於吾蘇之禍。止及吾民。而士類獲免。止於降黜。則或云。票出安慶相公。然亦非人力所及。蓋以天變不畏之璫。而此時亦若有惴心。稍委閣票處分者。豈非天哉。凡吾蘇士民親友。為吾公奔走捐助者。不能盡記。如公姻婭之殷。汝劼介文交吾公者。以此舉幾破其家。而密交鄒虛王辭他館。課其諸子。則雖不北行。賢於北行也。文故紀北行而及之。至文樓遲定興吳橋間。為鹿為孫為范。數公家範更有可言者。鹿公之封翁。為成宇公。恂恂篤行。惟知誦法孔子。別無淫祀。子既職方。孫復發解。而身尚課農。朝夕靡倦。居然有伐檀氏之風。聞公壯年。公之父方持斧吳中。而公以青衿家居。時躬親負擔。以饁耕耘。以故家之僕從。無非田夫。求一布衣鮮整之僕。不可得也。而肝膽更甚。昔魏廓翁以大行人至其家。求識公。而公以我老儒。而彼縉紳。縉紳交自有吾子。何與我事。堅辭不出。比廓翁被逮。魏公子持蓼翁八行投職方。職方方經理榆關。公得書。曰。此吾子之友也。可以吾子不在辭乎。遂身為居停。每對食。見魏公子泣。則不勝傷。時吐其脯。至欲質

產為助。又聞公艾年喪偶。終身不再娶。門庭肅然。職方氏年方五十有二。而鬚鬢皓如。與封翁幾若伯仲。蓋以急友之難。一夕而白。同榜中吾公即與定交在此。急吾公之急。化無為有。肝膽所不必言。親朋四出問金。而相對不輕齒。及以故其僕從寂無知者。比范公金至。方求公命。使促孫啟美。兄公已先期命人往矣。作事之密。趨事之敏。亦可窺見其微。子孝廉公仁卿。惟知下帷門外之事。即試事亦不一與。其父子祖孫間。真令人相視醉心。師法不遑也。孫公齡十七領鄉薦。已為孝廉二十七年。而四壁蕭然。一無所有。昆季四人。每食必聚。更相僕從。疏食菜羹。陶然自得。忘其為貧也。文初謁公。與公並騎而行。將至。公下騎步趨。文謂已至耳。不知乃道經其尊公墓也。因為訪其疇昔廬墓之所。併讀諸君子咏其廬墓之章。宛然孝思。令人傷感。如公者。孝廉二字。真不媿哉。而其兩兄一弟。俱篤行君子。弟即啟美。兄奔走吾公之事者也。若范公者。高義所不必言。時其太尊人宦遊。而太夫人在堂。朝夕往朝。不啻嬰兒之慕。聞曩者太尊人為湖州別駕。偶抱疴。報至。時方娶媳。吉事未畢。即刻疾馳不八日。已至湖。蓋一日夜馳三百里也。延明師於別業。課其族人。雅有文正之風。師即用舟。康先生。古人也。已登明經薦。而甘苦督課。居然寒儒。康有二子。彬彬謀恭。次子諸生。

乃儒其冠。長子尚未泮遊。則冠齊民之冠。文登其堂。為之留飲。其子掃除擊捧。惟恐不及。文再四為設坐。阿翁弗許也。而仲昌李兄一種奇特之氣。英英逼人。吾公之未沒也。則慷慨相期。吾公之已沒也。則悲歌相卹。披肝瀝膽。把臂慇懃。即肉骨不啻。以上諸君。皆夢寐勿諼。而恍然在目者。故特為之附及。乃有吾蘇鐵賈張全倫。晉人也。彼未嘗沐公之恩。而第感公之知。吾公之遠。亦捐助十金。又惓惓為諸公子計。曰。公子年少。非得疇昔父執諸君子為之主持。不可。事期必行。言期必聽。乃克有濟。乃克無負清白吏子孫噫。斯言也。斯念也。而發於晉之賈人。雖數君子金石之誼。必繇斯鞅。然旁觀一種議論。自不可少。倘諸君子而計及於此。則公之諸孤。既為大賢之苗裔。又得眾正之夾輔。必且儼然成其為道器。疇謂公死乎。疇謂公死乎。紀北而終之。以此所望於諸君相成之誼。匪淺哉。

北行日譜附書

夢洲周先生書

廓翁事已付之一痛矣。翁兄生死交情。眼中未見其兩。感極。容面時悉之。築室將成。弟已作避世計。知亦有道者之所深許也。不盡。

傷哉。此周先生手書也。先君云。於都中尚有數楮。幾為邏卒所獲。悉已火之。止存斯東。乃先君為魏先生後事所寄者。不數日而先生亦被逮。頃簡筭中。讀之涕下。謄錄首端。以識愴感。

湛持文先生書

讀手議。當日情形了然。可作他時信史。使人誦義無窮。彼以不及視。舍為兄遺憾者。不知其間無數委曲耳。飲冰吞炭。冷暖自知。惟有腸痛。弟憂患餘生。復多疾疢。閉門戢影。不知作何稅駕也。原稿奉上。秘之篋筭。留為金蘭譜中一段苦海耳。

又

子佩雖當入都。恐無同之者。未可遽行。尊諭動呈之說極當。但今當事諸公。謹畏太過。鄉紳又鮮慷慨激發者。所恃天子神聖。遠駕堯舜。前敕諭有哀恤。贈廕諸語。此時

當有處分矣。贈謚祠廢。四者缺一不可。然固非一時一人能辦也。道體久病。此時須萬念放下。乃稱善攝。吾輩後死之任。必無少怠。幸勿注念。以耗精神。參價一兩奉上。空囊殊媿菲。亮希亮希。

現聞姚先生書

初意目譜。迺吾丈自叙生平耳。不知其為亡友北行事也。披緘盟手。焚香卒讀。不禁泫然。此兄受奇禍。惜其不能效忠愍公。就榼牀上作年譜。而吾丈代為之。他年信史。寧不以此為左證。至於周旋險阻。生死共之。古人中寧復多得。友道如土。即涼燠輒為改念。况於安危。賴吾丈手綰而肩維之。真狂瀾一柱。若弟輩。惟有自媿自嘆而已。其與鹿乾老措處者。洵不可負。弟輩業已心識之。來稿謹當使馳納。一片表意。少佐藥餌。幸百惟珍。重是禱。

又

累承手教。因入鄉營葬。不能速答。為辜。聖明在御。沈寃欲洗。伏闕上書。此其時矣。但上疏後。必得都門有大力者為之照應。方得如意。今所仗者。一聖君耳。若在廷諸臣。猶昔日也。子佩孑身而往。孱然書生。有閹難叫。故鄙意與同志者商之。必得拔茅有

機方可挾以俱往。目下恤典自有公論。若補其所未備。不妨徐圖之。至於三學公呈。求當事代題。文試觀今之當事者。果其人否耶。前日毀祠毀像。不肖欲取煨燼之餘。以告蓼兄之靈。而府公尚斷斷不可。况有進於此者乎。知丈熱腸如火。姑少待之。吾輩後死之責。正有在也。前所致范質老書。不敢深促。恐其以此為歉。但有書寄鹿乾老。則以重擔累之。殊切不安。或徐而為之計耳。至丈所計兩書。仍在張業師吳囊中。弟未嘗取歸也。蓼兄像得其髮鬚。覽之痛絕。尚未忍捉筆題像。仍奉納尊體未痊。尚慎攝自愛。顏楊云云。中心藏之。

文姚兩先生昔許題詞。今在都門。遂以當弁語。

質公范先生書

自黑氣一道。飛集貫索。而天地震怒。四海鼎沸。凡在同志。能不倍切沈痛。自傷僻蹤。在遠。一介無聞。臂指莫効。空負鬚眉。誦良朋永嘆之詩。為慨然太息。門下左右周旋。不避艱險。嶽嶽高義。真足千古矣。聖明在宥。詎宜有此過舉。然非有此。何見至人肝膽。從來忠臣義士。時窮乃顯。天未始無意也。然使朋友一倫。不至獨輕於世。此所維係甚大。不佞私心佩服。匪止急難之誼而已也。數日晤對。仰見一往意氣。令人心折。

歲寒深盟從此始終以之。皦日在上。無忘此言云云。拮据累日。東貸西借。有類持鉢。僅得如許。薄俗悠悠。視貴鄉吐嗟。鍊金真當愧死矣。人定興。更得何等消息。願望好音。目斷神搖。銀二百兩。計五封。布灼入。

又

嘗讀暉書。至李固之郭亮。陳蕃之朱震。孔融之習胤。慨然想慕。以為今無其人。不意於門下見之。當此世道交喪。得一人維持交道。可以不孤一段氣誼。獨存天壤間。亡友之銜結。又其次矣。別後愴怳累日。不能為懷。計期此時。門下已抵里門矣。渠家能存立否。官銀有著落否。門下一到。事事經紀。諸子無父有交。周兄雖亡不亡矣。思生死之交。門下當其難者。我輩地遠。力難相反。苟有可効。不惜踵頂。走使往看。幸委曲見示。好從事也。文老一種肝腸。深用敬服。不避未同。一書致謝。幸惟有以先之。令郎清恙。想已霍然。阿膠一封奉用。他不能有所寄將也。台文平日行事。可臚列數則見教否。南羽不乏。冀有嗣音。

又

方欲遣使而濟寧人到。忽接手書。委曲籌畫。深服有心人之為計。周而慮深遠也。前

物門下既不肯搢。只得暫還原主。績致便覺甚難。王中丞處聽其自行捐助。未敢掠美市恩。正在勉強湊處間。見書暫止。先走价請教。恒產之置。不佞以身任之。交價即明春不遲乎。台丈一面安慰其家。一面為之訪問。必期得當。以為久計。諸子督課無人。恐致失學。門下且以師分臨之。讀書作人。萬萬不失。并其家事。亦便料理。若文字則間送文姚二公處一看。似極妙著數也。但須十分省約。十分攻苦。以感天心。而待天定。善人之後。安有不昌者。始之終之。惟台丈一人造之矣。一書致奠。乞遣使指往。若誅章則尚有待耳。

又

數數奉書。具悉近狀。知以清恙為苦。中心懸念。不能已已。久欲遣使馳候起居。因為先慈歸藏計。拮据年餘。心血都嘔。冬抵乃畢。窀穸而體病遂不可支矣。日日負土荒丘。百念灰冷。所不能了者。惟有前議宵寐以之。難置諸懷。但大事之後。不免再行稱貸。錢某既以未周。不便開口。且竊議我以當官不能作家。舉為笑柄。即游宦者。又有形迹之嫌。更曰自居於清。何以濁待我。所以更難更苦。盡力搜括。得九十金。又邀同人王葱。嶽中丞五十兩。張蓬元司馬。李性參憲副各三十兩。此皆海內正人。不佞同

志。咸忻然樂助者。尚使奉上。以卹周公子。門下查收產。便即以付之。不便仍存貯以
待。勿使零星花費也。還念門下周旋覆巢之家。不知費多少善書。塾師得人。日用粗
遣。皆翁兄明賜。不佞以為天生偉人。俱足補世界闕陷處。非謬也。新君登極。掖肘大
奸。既已除翦。朝端漸有清明氣象。私意諸賢子孫。政當為叩關之舉。高明必有定見。
自無待不佞言也。尊恙勞而兼鬱。多方調攝。以輔聖朝為祝。

乾岳鹿先生書

別後兩從吳橋使。讀仁兄所寄。而其人。有來無往。不佞無由附報章。此番乃得從張
異度兄手。以佈積悃。夫前為蓼洲年兄貸事。不佞原以身任之。仁兄自京遣來之券。
不佞已即時火之。周氏諸孤。既驚覆巢。復苦立壁。豈有割饔殮以償前事。必拒不佞
於蘭藉外。不使得効一毛於緩急之數哉。仁兄過執。不必然之小信。而未暇為不佞
地。今以後。願勿再提。只以弟情告於蓼洲兄几前。以百五十金。當不佞千里之東。氣
則仁兄之相諒相愛者至矣。孟長兄有字。亦以此語為報。仁兄欲自為信。當容不佞
使勉為義。不佞得自附於義。而仁兄之信。自在積悃萬縷。未遑詳布。先以緊關之情
奉復。計此紙得達。而仁兄清恙已愈多時。天相吉人。自當勿藥。

仁卿鹿先生書

憶自丙寅言別。見翁兄悲憤成病。私恐難涉長途。深以為念。後從范質翁年伯處。知抵里門。且接手書。始慰遠懷也。嗟乎。誰非朋友。臨難始見交情。翁兄護累客於危途。逐忠魂於歸棹。若茲肝膽。何必遠慕古人哉。聖人臨御。正氣大伸。卹錄明綸。輝流黃壤。翁兄追死念生。更當破啼為笑矣。春初入都。晤異度先生。再接華函。三載離懷。恍焉如對。獨是翰教諄諄。恨前約之未結。則甚不必也。夫當日事急稱貸。家君已身任其償。即未明言。盡以相助。固心許之矣。周年伯後事雖完。而伯母世兄。即舉火之需。尚須區算。安得贏餘。復償此項。寒家雖空囊羞澀。然薄田數頃。歲可稍出其息。節次完之。幸留得此身在。其餘皆易處事耳。翁兄前件。便從今日勾銷。無勞再以為念也。已與異度先言之。煩致之諸君子。家君尚有一牘。續寄。偶因南鴻之便。先附此函。聞道體久病。尤宜自珍。握手何時。不勝悵然。

譜中。范公產金。鹿公貸金。為先君未了之願。垂暎不忘者。其自范公第四東及鹿公橋梓東。咸先君蓋棺後所來。痛未及見。梓之以竟前事。併高誼云。

北行日譜終

跋

嗚呼此先君從難次第北行之事父執諸公讀之泣下者也周先生建忠抗節忠愍公後一人被逮開讀郡人士奮迅感慨哭聲震天而匹夫慕義視死如歸者五直道不亡真足褫大慙之魄而伸忠孝之氣顧當事者忿嫉益甚鍛鍊之謀益以刻深當斯時也岌岌殆哉先君獨毅然從先生往戚友無不重為惴恐屹不為動周先生嚴氣正性覆折而逾堅既以完節高千古而先君以一身周旋其間臨難不憚知無不為遂至病中肺腑慷慨矢曰公舍我死我何用生為欲伏闕為公鳴寃念徒死無裨且公以先人葬事見託諸公子後事百未及一圖無以瞑公目姑後死以了公事故於九京報命書有云不久且當從公地下隨以寃宥商之桑梓諸公恒產謀之吳橋范公延師肄業則任之舊西席鄒虛王先生事差有緒而先君病日重矣血時嘔矣裏疾以竟斯譜謂公忠孝大節日月常鮮至於從容就義威武不屈之概非此不悉且諸公急難之誼有不徒付之永歎者咸於斯可考焉譜成遇聖天子臨御乾坤重關喜曰不圖垂暝尚及見茲伏牀北叩誦聖明迨易黃之辰猶呼壽陽扶掖手書上文姚兩先生促叩闕洗寃急表忠魂曰今而後吾有以謝良友矣投筆而逝無一語

及家事嗚呼痛哉先君砥礪廉隅以名教為己任生平大行更僕未易數善陽另當
詳述用乞大君子一言以垂不朽獨計斯譜周先生殺身成仁之義樂天知命之誠
披覽如見情形不隔尤先君沒世苦心所寄今周先生誼勤聖主特表清忠而先君
見背忽已二祀士無賢不肖不沒其親之志各有同懷欲先錫斯譜徧呈鉅公竊愧
蕭然不能剴劇異翁張先生慨然任曰此爾先人一段精誠其可泯滅乎疏諸好義
自兩如顧先生始而維斗天如吉士諸兄咸從同社糾金克成是集此皆張先生好
義之倡而諸君子聲氣之應也中心藏之何日忘之先君於理學經濟諸書纂述百
種不肖所以有硯面目每生于世者以懸絜有待未成厥志耳罪人哉

不肖男壽陽增百拜謹跋